

1. Kulturno-literarni rad u Zagrebu za prvih pet vijekova njegove historije (Katalog kulturno-historijske izložbe grada Zagreba str. 11—28).

2. O najstarijem bogoslužju Posavske Hrvatske («Zbornik kralja Tomislava» Jugoslav. akademije str. 509—553).

3. Obredno-liturgijske igre u zagrebačkoj stolnoj crkvi (Narodna Starina, knj. IV, str. 1—16).

4. Kr. sveučilišna knjižnica u Zagrebu (Sveučilište Kraljevine SHS u Zagrebu 1874—1924. Spomenica Akademičkog senata).

5. Novi prilozi za povijest hrvatske crkvene drame (Nastavni Vjesnik, knj. XXXVI, str. 1—21).

6. Prilog za historiju hrvatsko-srpskih književnih veza u 18. vijeku (Nastavni Vjesnik, knj. XXXVI, str. 241—261).

Kako i ovi najnoviji radovi dra. Franje Fanceva pokazuju one dobre osobine, što ih je u predašnjima našao i istakao akademik dr. A. Musić, predlažem Jugoslavenskoj akademiji, da dra. Franju Fanceva izabere za svoga pravoga izvanrednog člana, uvjeren, da će dr. Franjo Fancev u tješnoj naučnoj svezi s Jugoslav. akademijom razviti još jače svoja korisna istraživanja u historiji hrvatske književnosti i jezika.

U Zagrebu, 3. februara 1929.

Dr. Stjepan Ivšić

Vasil N. Zlatarski.

Vasil N. Zlatarski rodio se 14/27. novembra 1866. u Velikom Trnovu. Prve škole svršio je u rodnom mjestu, a onda je pošao na dalje nauke u Rusiju, gdje je najprije svršio prvu klasičnu gimnaziju u Petrogradu, a onda historijsko-filološki fakultet petrogradskoga univerziteta. Ovdje je najviše radio kod profesora Lamanskoga i Vasiljevskoga, pod čijim je nadzorom izradio i svoju prvu raspravu: »Pismata na carigradskija patriarh Nikolaj Mistik do blgarskija car Simeona« (štampana u Zborniku bug. min. prosvj.). Poslije dovršenih nauka u Petrogradu Zlatarski je pošao u Berlin, da se ovdje specijalizira za arheologiju, a onda se vratio u Sofiju, gdje je najprije službovao na srednjoj školi, a od 1. septembra 1897. dalje najprije kao docenat na Visokoj školi, a kad je ova 1904. podignuta na univerzitet, kao profesor »bugarske historije i historije balkanskih naroda«. U tom je položaju još i danas.

Zbog svojih naučnih mnogobrojnih radova prof. Zlatarski postao je članom ovih učenih društava: Bugarske akademije nauka (od novembra 1900.), Ruskog arheol. instituta u Carigradu (od januara 1899.), Moskovskoga arheol. društva (od novembra 1899.), Historijskoga društva moskovskoga univerziteta (od marta 1904.), Petrogradske akademije nauka (od decembra 1911.), Češke akademije nauka (od novembra 1911.), Fino-ugorskoga društva u He-

singsforsu (od decembra 1921.) i School of Slavonic Studies london-skoga univerziteta. Osim toga Harkovski univerzitet ga je učinio g. 1907. honoris causa doktorom slavenske filologije.

Prof. Zlatarski najvažniji je predstavnik bugarske historijske nauke. U »Sborniku«, što su mu ga u čast 60-godišnjice života izdali kolege i daci, navodi se od 1894. do 1925. god. 127 naučnih radova, a taj je broj danas daleko veći. Naiglavnije je njegovo djelo »Istorija na blgarskata država prêz Srêdnitê vêkove«, što ga izdaje Bugarska akademija, a od kojega su dosada izišla dva toma, obuhvaćajući historiju prvoga bugarskoga carstva do 1018. (Sofija 1918., 1927.). Kako se prof. Zlatarski u tom djelu mnogo obazire i na historiju Hrvata i Srba, i to s punim naučnim razumijevanjem problema, rad je njegov od značaja i za našu narodnu historiju. Zato predlažem prof. Zlatarskoga za člana dopisnika u historičko-filološkiem razredu.

U Zagrebu, 15. januara 1929.

Dr. Ferdo Šišić

Hugo Werk.

Hugo Werk rodio se g. 1874. u Šibeniku. Svršio je pravni fakultet u Gracu, gdje je i promoviran na doktora prava. Poslije je bio advokatom, ali je služio također kao sudac. Sada je advokat u Zagrebu.

Radio je naučno i literarno u ob'asti prava, sociologije i izvanjske politike. Od njegovih radova navodim: Ovrha na nepokretni imetak (Mjesečnik 1904.); Pljenidba kao prvi stepen ovrhe na pokretne tjelesne stvari (Mjes. 1917); Sistem austrijskog ovršnog reda, dva sveska, 1904. i 1907.; Cenni etnografico-storico-politici sulla Dalmazia, 1919. Razni sastavci pravne i političke prirode po domaćim i stranim časopisima, osobito u »Mjesečniku Pravničkog društva« u Zagrebu, »Arhivu za pravne i društvene nauke« u Beogradu, u tršćanskom »Pravnom vesniku«, »Novoj Evropi« u Zagrebu, u berlinskom »Ostrechtu« i u milanskoj »Rivista Italo Jugoslava«. — Uređivao je u krilu Narodnoga Vijeća u Zagrebu godine 1919.—1920. politički tjednik »L' Adriatico Jugoslavo« za sve vrijeme njegova izlaženja.

Na osnovu svega predlažem, da dr. Hugo Werk bude izabran za člana dopisnika u razredu filozofičko-juridičkom.

U Zagrebu, 2. marta 1929.

Dr. Marko Kostrenčić

Vladimir Becić.

Rodio se u Zagrebu 1. juna 1886. Maturirao u Zagrebu 1904. god. Svršio umjetničku akademiju u Münchenu. Iza toga boravio na studijama u Parizu. Bio je kao dobrovoljac na solunskom frontu